

太原府志卷九

山川

禹貢有圖山海嶽瀆有經險阻之區靈秀鍾焉晉省河山表裏太原居南北之中枕太行而帶河汾其間崇岡巨浸碁布星羅皆扶輿清淑之氣所爲宛延而磅礴也地靈則人傑其生是土而爲河山生色者固宜代不乏人也哉志山川

陽曲縣

崛峴山在縣西北四十里城西北有呼延村踰呼延而上羊腸鳥道復上石磴谿舂不能旋足行寢近峰勢巍嶷崛峴寺繇林杪閃出陟巔名山莊頭俯視諸巒如拱如揖幽泉怪石聞不聞聲歲秋季卉木色胥赤八景所謂

太原府志

卷九 山川

崛峴紅葉是也

國朝朱彝尊崛峴寺題名記崛峴

寺在太原府治西三十里亂山中間其地與竇鳴犢祠相接思覽其故迹丁未二月望王公子干之期予偕游並馬入山寺詢病頭陀則去鳴犢祠尚遠遂不果往日亭午童子行五里沽燒春還注之僧盃兩人對酌干之問崛峴字義予謂其初必無偏旁疑村夫子強加之郭忠恕有言飛禽卽須安鳥水族便應著魚俗書滋謬二語盡之矣飲半酣題名寺壁而返

罕山在縣東北五十里榆次縣北界其山自太行連絡而下層巒起伏視諸山獨爲壯麗故名圖經謂之看山金興定三年九月遼州刺史郭文振招降太原東山二百餘村遷老幼於山寨得壯士七千分駐營柵防護秋



獲文振奏若秋高無兵直取太原河東可復優詔許之  
冽石谷在縣西北四十里一作冽石山罅出泉傍有龍井  
所謂冽石寒泉也有竇鳴犢廟 冽石口巖穹百重如  
斷如削汾河繇口出竇大夫祠西數泉泠泠可愛名寒  
泉 金史純英濟侯感應記汾水之濱有祠曰英濟俗  
呼爲冽石神蓋里俗傳之訛取山石分裂水從中出而  
名焉其實非也又史純記英濟廟之右有數泉出於蒼  
崖石脚間旱焉不乾水焉不溢湛然澄澈可鑑毫毛深  
疑神物窟宅隱伏於中距數步則洪流奔涌滔滔然勢  
不可遏惜乎地多沙漬逼於河汾不然則鑿渠改流灌  
漑民田濟物之功不在汾陰昭濟之下矣 明于謙烈  
石祠碑其地山川環抱樹木蒼鬱朝雲暮靄恒出簷楹

太原府志

卷九

山川

二

棟宇間祠之右有池靈源浚發澄波滉漾穹甲巨鱗出  
沒天光雲影中隱現恍惚若有神以憑之

乾燭谷在縣西北六十里卽天門關也關設亂山中雪積  
不化王冕嘗大雪陟巔大叫曰遍天地皆白玉合成令  
人心膽澄徹便欲仙去東北爲楊廣道當繇隋大業中  
自并州幸汾陽宮時特開此道祝志縣志胥云魯王圍  
廣時所建宜覈 通志有乾燭谷卽羊腸坂也 唐晉  
陽尉富嘉謨撰乾燭谷頌

陳家峪在縣東十里

楊家峪在縣東十里陳家峪南

鐘家峪在縣東十五里楊家峪東南路通壽陽居民業磁  
器



淖馬村岡在縣東十五里層阜疊嶂碁置卦列岡前溪水如帶南入於汾

紅子峪在縣東十五里

李家山在縣東壽陽界

聖廟嶺在東菜村有先師廟

六龍山在縣東南十五里開馬村後 城東迤坡山差迥

秀一名綠雲山南有神清觀東五里有釜頭山

水峪在縣東南十五里

南寨山在縣西南清源界

西峙山在縣西南有華山朝陽嶺夕照峰伏魔巖長生洞

文殊頂又有瀑水簾飲龍湫飲牛灘白石灘飲龍湫卽

天池也中有龍窩巨石石室石門石筵石牀下有西河

太原府志

卷九 山川

三

古洞水涸明季梁檀肆丹青於此

風穴在縣西二十里石壁有穴下建廟相傳神至則穴內有聲去則否

狼虎山在縣西三十里中有狼虎寺

西谷洞在縣西七十里山中有古石洞相傳張仙蛻此昔土人秉炬尋源行二十餘里未得涯際乃返

鴉兒旋仙洞在縣西七十里

石家昂在縣西山峭壁一崖汾水環流土人傳王將軍避

此 明王道行詩平田忽出藤蘿外水湧蓮峰九派浮  
胭脂坡在縣西山王道行有詩

芙蓉峽在縣西山王道行詩遍插芙蓉亦太奇極天鳥道  
水之湄



懸崖在縣西山王道行有詩

石漕谷在縣西產桃

石唐窰在縣西北二十五里張村

北巖在縣西北四十里冽石谷內前臨汾流後峙石壁飛瀑色如雪聲如雷

土堂寺山在縣西北四十里劉村後倚崇岡前臨汾水沙鳥出沒雲烟隱現寺有巨栢十餘株蛟蟠虬屈所謂土堂怪栢也

亭子山在縣西北五十里下有桃花三洞五代白朝嘗讀書於此

石尖峰在縣西北六十里烈石谷口有孤石立汾水側高十丈有奇

太原府志

卷九

山川

四

周家山在縣西北掃石村西五里汾水經其下

掃峪在縣西北一百十里有掃谷水

珍珠坡在崛巘山昔有閣黎住五臺後棲於山日汲汾水淚滴如珠乃詣文殊告乏水相傳命黑龍神護歸獲二

龍池日飲萬人不竭後人因名坡爲珍珠坡

繫舟山在縣北九十里忻州南二十三里禹治水繫舟其上故名其石如環軸曰繫舟峴 明一統志繫舟山乃元好問父德明讀書處趙秉文更名爲讀書山好問詩曰從此晉陽方志上繫舟山是讀書山一名小五臺上有文殊石洞歲旱取水於此

藥羅山在縣北九十里太平鄉之辛莊山勢雲葉杈枒如藥始芳鱗鱗鬚鬚如羅紋疊所謂藥羅春色也



方山在縣東北六十里清源鄉西二十五里嶺方

漢棚山在縣東北六十里接孟縣鴉鳴谷

阪泉山在縣東北八十里罕山西北古名漢山有白龍黑

虎二池

晉地志云晉文公卜遇黃帝戰於阪泉之兆

因立廟於此歲兩祀

山麓前臨巨澗左帶挑崖勝水

諸山重巒拱秀

織笄山在縣東北九十里卽繫舟山之陽也一名鳳凰山

其形如鳥舒翼東接卧虎山西南接馬頭山羣峰羅列

又名五峰山

金元好問織笄山詩繫舟南北暮雲平

落日滹沱一線明

梁鴻山在縣東北九十里乃織笄支山也

龐家山在縣東北百八十里

太原府志

卷九 山川

五

摩笄山 五朝志汾陽有摩笄山 保安州東有雞鳴山

飛狐縣東北百五十里濟南府長清縣晉有摩笄山

魏土地記摩笄山在代郡東南二十五里一名馬頭山

括地志摩笄山在飛狐縣東北尹耕謂代郡廢城東南

二十餘里馬頭山卽爲摩笄要以代州志爲正而五朝

志列於正史其說亦宜參考

五鳳山在縣東北孟縣定襄界

真金佛洞在凌井溝峭壁數仞土人傳嘗有金佛云

潛邱爾雅晉有潛邱郭璞注云在太原晉陽今無考

小五臺山在府城北九十里

按小五臺有三處一在省城崇善寺前上有文殊勝境

文昌閣魁星樓每逢七月七日都人士往遊焉一在榆



次縣一在繁峙縣俱名小五臺 崇善寺前小五臺通志未載

汾河由交城縣火山東流入縣境出列石口南流經城西門外二里又東南流入太原縣境 水經注魏土地記曰秀容部人徙居之立秀容護軍治東去汾水六十里南與酸水合水源西出少陽之山東南流注於汾水汾水又南出山東南流洛陰水注之汾水又南經陽曲城西南注也

汾河渡在城西南路通太原縣

西湖景又名水晶宮在南關內西隅四周胥水荷荻渺瀰尚家海子在縣西南

柳溪在縣西一里汾堤之東宋天禧中陳堯佐知并州因

太原府志

卷九 山川

六

汾水屢漲築堤周五里引汾水注之環植柳萬株中有枕華堂堂後通芙蓉洲堤上有彤霞閣每歲上巳太守泛舟郡人遊觀焉久圯於水斷碑尚存

龍泉有二一在城西二里南流入太原縣界一在城西北百五十里靜樂縣界流經盧子社至橫渠合掃谷水宋天聖二年夏水大漲知太原府陳堯佐作新堤捍之并人賴焉

按城西二里卽汾水也蓋泉與汾河並爲一矣

西山飛瀑有王道行詩搖空珠瀑瀉銀河

烈石泉在縣西北四十里發源烈石谷南流三里入汾汾得烈石泉勢始洶湧 李頻詩泉分石洞千條碧人在水壺六月寒

烈石池卽烈石泉在縣西北四十里烈石廟西池水徐徐



而出入於汾不相合惟清水一泓流二十里始合汾諺曰清水半壁渾水半壁

元泉在縣西北五十里峭巖滴水寺額亦曰元泉

石橋河自孟縣界西南流經城西北合洛陰水河有石橋

故名明一統志經城西南按城西南乃汾堤也

掃谷水源出縣西北百二十里掃谷南流出天門谷入汾

南社河在縣北十里流入汾

洛陰水在縣北三十里源出故新興郡南流經洛陰城北

孟縣東北故城南其近孟縣界西南又有石橋河水胥

西流經狼孟縣故城西合真谷水又西南經陽曲灣入

於汾 水經注汾水東南流洛陰水注之水出新興郡

西流經洛陰城北又西經孟縣故城南春秋左傳僖公

太原府志 卷九 山川

二十八年分祁氏七縣為大夫之邑以孟丙為孟大夫

水又西經狼孟縣故城南王莽之狼調也左右夾澗幽

深南面大壑俗謂之狼馬澗舊斷澗為城有南北門門

闔故壁尚在洛陰水又西南經陽曲城北魏土地記曰

太原界置陽曲護軍治其水西南流注於汾水按洛陰水明縣

志不載蓋明人止據水經注而古今之地形異也明一統志合真谷水流至孟縣北故城南入汾是又參和水

經注而失之也

真谷水源出城北七十里南流經狼孟城西合洛陰水一

作直谷

陽曲川在縣東北三十里木井城一名陽曲澤又名陽曲

灣

澗河水在縣東北五十里西南流入汾



星聚泉在學宮前味甘蓋作六孔象南斗星故名  
龍王井在文廟西北隅大新街味甚甘爲晉省第一泉  
丹井在今額外營東城門內味冽明晉邸有金棗丹治疾  
甚驗惟用此水

八角井在叅將府街味甘名琉璃井又名金波泉  
九間橋河在七府營街南橋下水名小兒河

飲馬河在阜成門內街南明晉藩三護衛軍飲馬於此一  
名文漪湖

長海子在貢院右

圓海子在貢院後一名文瀛湖

國初水勢浸大知府王公覺民導入長海子又尋南城牆  
古水口疏通導水入汾民獲安址裴通政因密邇文場

太原府志

卷九 山川

八

更名爲文瀛湖增八景有吳水煙波卽此

太原縣

龍山在縣西八里遞高五里有瓦窰峰高四十丈有花巖  
塔高踰瓦窰南連懸壘山西連方山北至黑沙嶺北齊  
以山名縣上有唐相國裴休退隱遺址北有童子寺南  
道中有白魚泉一名天龍山 漢志龍山在晉陽縣西  
北晉水所出東入汾 五朝志晉陽有龍山蒙山 元  
和志懸壘山一名龍山在晉陽縣西南十二里晉水初  
泉出處 溫大雅創業起居注十三年歲在丁亥正月  
丙子夜晉陽宮西北有光夜明白地屬天若大燒火飛  
燄炎赫正當城西龍山上直指西南極望竟天俄而山  
當童子寺左右有紫氣如虹橫絕火中城上守更人咸



見之又衛嵩歌曰西北天火照龍山 周經留題天龍洞詩雲影低遮黃石洞泉聲清繞白龍祠隋朝寺紀開皇歲齊主宮存避暑基詩注閣東皆有洞閣左有白龍神廟廟下有泉閣下有高齊避暑宮遺址

懸壘山在縣西十里高七十丈山下出晉水東至晉祠北連龍山山腹有巨石象壘因名宋仁宗時地震巨石摧壞無復甕形矣 山海經有懸甕之山其上多玉其下多銅其獸多闕麋晉水出焉東南注汾郭璞曰在晉陽水經晉水出晉陽縣西懸甕山 水經注晉書地道記及十三州志並言晉水出龍山一名結紉山在縣西北非也山海經曰懸甕之山晉水出焉今在縣之西南地形志晉陽有懸甕山一名龍山晉水所出東入汾有

太原府志

卷九

山川

九

晉王祠梗陽城

劉紫巖集王晉溪太宰卜築於晉祠

水邊甚爲佳勝乃自綏德謫所以書來乞詩自謂兒輩近爲我營一佚老之所池館之間賸植花竹稻畦蒲汜烟汀雪瀨瀾漫極目頗得秀潤閑雅之趣搢紳多爲詠題在通家不宜獨闕乃疊韻以四律復之 齊神武徵范陽祖鴻勳至并州作晉祠記好事者翫其文 齊神武與諸人同詣晉祠皆屈膝盡禮常山太守薛孝通獨捧手不拜顧而言曰此乃諸侯之國去吾何遠恭而非禮將爲神笑拜者慙焉 魏正光中華陰楊愔遵彥隨父司空津之并州性旣恬默又好山水遂入晉陽西懸甕山讀書 齊大鴻臚王晞嘗詣晉祠賦詩曰日落應歸去魚鳥見留連忽有相王使名晞不時至明日丞相



西閣祭酒盧思道謂晞曰昨被名已來頗得不以魚鳥致怪晞緩笑曰昨晚陶然不以酒漿被責卿輩亦是流連之一物豈直在魚鳥而已 李嶠攀龍臺碑母嘗祈晉祠於水濱得文石一枚大如鷓卵上有紫文成日月兩字異而吞之 元好問詩石橙雲松着色屏岸花汀草展江亭青瑤疊甃通懸甕白玉雙龍掣迅霆 趙可自白雲歷石甕至明仙詩白雲下明仙巖路縈九折僧居未離人西崦頗孤絕萬株倚空青雙壁似天闕 相傳懸甕山移半里而奉聖寺不動

崖山在縣東西陽雜俎太原縣東有崖山大旱土人燒此山以求雨俗傳崖山神娶河伯女故河伯見之必降雨救之今山上多生水草

太原府志

卷九 山川

十

方山在縣南三十里高百三十丈東連龍山南至黑龍凹三里西至石亭山七里北至風峪山十里下有泉又有白龍池

馬房峪在晉祠鎮南門外出礮山有普照寺五代桑魏公維翰嘗留祠堂云

卧虎山在縣西南七里榆次縣罕山之南產石炭高三十丈有奇形似卧虎龍山懸甕山環障於外南至明仙口西至明仙峪北連龍山山北有井相傳宋太祖鑿卧虎山血出成河故橋名赤橋卽古豫讓橋也

明仙峪在虎山西龍山南產炭川谷清幽乃龍山之半也柳子峪在縣西南十五里入天龍寺道產礮炭祝志作槐子谷內有插旗石白深三尺



礮石山在縣西南十五里高七十三丈東至清楊河三里南至黃蘆峪五里西連天龍南山北至尖山半里山有寺下有泉一泓

黃蘆峪在縣西南十八里產炭

尖山在縣西南二十里高九十八丈合礮石山盤踞四里東至清楊河三里南至礮石山半里西連天龍南山北至鴉兒溝半里下有泉一泓山產炭

閻家峪在縣西南二十里產炭

葦谷山在縣西南三十里高七十丈東至山麓十五里南至清源界石叫村三里西至武家崖五里上有仙巖禪寺青龍白龍二池山北有齊神武避暑宮

南山在縣西南三十里高百丈有奇東連尖山礮石山南

太原府志

卷九 山川

至南峪山二十里西至石亭山七里北至黑龍凹二里山半有泉一泓

杏坪在縣西南西山中

吳家谷在縣西南

風洞在縣西三里風峪口甕甃洞一穴方五丈有司以三月祀否則多風穴中三柱四壁鑄華嚴經

太山在縣西五里高九十丈最高爲東坪峰西坪峰東至山麓二里西北連蒙山北至瓠子溝一里上有龍泉一

泓

風峪在縣西五里五龍纏青崇巖胥在內產炭

響洞在縣西風峪口內太山寺北二里山中人跡罕到方五尺有奇高下如之人吐語則訇然有聲明正統間邑



御史王鑑讀書於此少倦輒聞人呼名疑爲山靈云  
風谷山縣西十里高七十八丈盤踞二十里有奇路入交  
城樓煩唐北都西門之驛路也東至龍王堂西連亂山  
最高峰名馬回尖石壁有穴相傳神至則穴有聲去則  
否山巖石礪篆文洞中有北齊天保時刻佛經石柱一  
百二十六朱彞尊詩峪藏千佛經遺蹟久未壞

象山在縣西十五里

趙家山在縣西山西

成家谷在縣西山西

石室山在縣西北七里地道記太原郡山中有石室方丈  
四尺壁有古篆人莫之識

蒙山在西北十里高一百四十丈有奇盤踞三十里南連

太原府志

卷九 山川

七

太山最高名蒙山砦山下有甘泉一泓漢劉聰攻劉琨  
不克掠晉陽之民踰蒙山西遁卽此上有周將楊忠碑  
下有劉薛王避暑砦 蘇禹珪重修蒙山開化莊嚴閣  
記峪通馬首地管羊腸 高若岐記繇沙溝北轉見石  
山從面起水自山上飛撲而下山形如樓臺歷數重至  
水源徑東北懸而上西得磐石倏見石塔坪聳峙於南  
斗折蛇行二里許有最高峰謂卽砦比至復爲數峰所  
壓更跨一壑折西北始於羣峰間露巘岒而拔起者而  
後爲蒙山之砦七八折抵其前陟巔寬平有石蓮池注  
底石及基地砌形劉繼元避暑宮之遺址也西山馬回  
尖漫天嶺而外胥拱於砦上此山與懸甕方山鼎立而  
所見尤遠



開化峪在縣西北十里居民業砂器

野峪在縣西北二十里產炭

井谷在縣西北二十五里

嬰山在縣西北三十里舊府志誤以為在縣西北三里高百七十丈盤踞

十六里即今五龍纏是也有妙尖峰東至站字崖二里

西至陽曲縣界十里北連青崇巖三里 隋圖經嬰山

為并州之主 歐陽詹登龍興寺閣詩千條水入黃河

去萬點山從紫塞來

九院峪在縣西北三十五里產炭

青崇巖在縣西北三十五里高八十丈有包塞峰高五十

丈東至大瓦溝三里南連嬰山西至陽曲界十三里又

北至老龍凹五里有泉接孫八峰

太原府志 卷九 山川

胡谷在縣西北四十里

虎峪在縣西北四十里產炭

小井谷在縣西北二十五里

大井谷在縣西北小井谷南

冶谷在縣西少北大井谷南

銀牛山在縣北西陽雜俎漢建武二十一年有人騎白牛

蹊人田田父訶詰之乃曰吾北海使將看登封遂乘牛

上山田父尋至山上唯牛跡遺糞皆為銀也明年封禪

黑駝山在縣東北四十里高六丈分上下二山東至榆次

縣界五里北至陽曲界七里中有泉一泓上有補恩寺

舊志二山對峙如駝峰而色黑故名

玉崖頭在天龍山北



介嶺 歐陽詹登龍興寺閣野望詩短垣齊介嶺片白指

汾流 水經注晉陽城南舊有介子推祠地形志同按

漢郭無為隱太原抱腹山劉鈞有智謀者段常薦無為以諫議大夫名之今太原無抱腹山當即介嶺襲綿山抱腹巖之名爾

朝陽洞二泉上二十丈有奇又上建呂仙閣

汾水在縣東十里繇陽曲城西南流入縣界南屯等村繇

西南馬村流入清源鄉界隸縣境凡七十八里 水經

東南過晉陽縣東晉水從縣東南流注之 水經注太

原郡治晉陽城秦昭襄王三年立尚書所謂既修太原

者也春秋說題辭曰高平曰太原原端也平而有度廣

延曰大鹵太原也釋名曰地不生物曰鹵尚書大傳曰

太原府志 卷九 山川 東原底平大而高平者謂之太原郡取稱焉魏土地記

曰城東有汾水南流水東有晉使持節都督并州諸軍

事鎮北將軍太原成王之碑水上舊有梁清泝頌於梁

下豫讓死於津側亦襄子解衣之所在也汾水西經晉

陽城南舊有介子推祠前有碑廟宇傾頽惟禪碑獨存

矣今文字剝落無可尋也 權德輿北平郡王馬燧行

狀公初旋師以晉陽大鹵用武之地北蕃東夏且有外

虞而都城之東平坦受敵乃股引汾晉二川漲為平湖

能順地泐以導水勢守陴者歲減其役濱河者日厚其

生而又廣堤濬池密樹如織金湯自固板幹不勤 北

堰中堰南堰相傳宋太祖引汾水灌晉陽縣城今有遺

蹟 五代史引汾晉二水以灌之水自城門入而積草

自城中漂出塞之及班師繼元決城下水注之臺駘澤



朱長孺曰智伯謂汾水可浸平陽宋取北漢亦壅汾水灌太原是汾水爲河東害甚大禹治之自不容緩豈獨以帝都所在哉

晉水在縣西南十里源出懸甕山下二泉北曰善利南曰難老疏爲二池南曰大池流經奉聖寺前名流盃池北曰八角池分爲三河其北派流經北神橋入安仁賢輔古城金勝等村爲北河卽智伯遏水以灌城者名智伯渠至唐貞觀中長史李勣架汾水東引令民汲飲後名晉渠今廢其中派入大池流經南神橋晉源都東莊爲中河又一派爲陸堡河流入大寺等村其南派流入索村等地爲南河胥總滙於清水河入汾其北渠舊引入縣地今渠存而水不行 水經晉水出晉陽縣西懸甕

太原府志

卷九 山川

五

山又東過其縣南又東入於汾水 王瓊崇福田莊詩 塋間有地皆流水寺外無山不繞城 水經注縣故唐國也周成王以唐滅封唐叔於唐縣有晉水後改名爲晉故子夏敘詩稱此晉也而謂之唐儉而用禮有堯之遺風也昔智伯遏晉水灌晉陽其川上源後人踵其遺蹟蓄以爲沼沼西際山枕水有唐叔虞祠水側有涼堂結飛梁於水上左右雜樹交蔭希見曦景至有良朋密友羈遊宦子莫不尋梁契集用相娛慰於晉川之中最爲勝處 汾水分爲二流北瀆卽智氏故渠也昔在戰國襄子保晉陽智氏防山以水灌之城不沒者三版與韓魏望嘆於此故智氏用亡其瀆乘高東北注入晉陽城以周漑灌漢末赤眉之難郡掾劉茂負太守孫福於



城門西下空穴中其夜奔孟卽是處也東南出城流注於汾水也其南瀆於石塘之下伏流經舊谿東南出逕晉陽城南城在晉水之陽曰晉陽矣經書晉荀吳帥師敗狄於大鹵杜預曰大鹵晉陽縣也爲晉之舊都春秋定公十三年趙鞅以晉陽叛後乃爲趙矣其水又東南流入於汾括地志同智伯圍晉陽決晉水灌之城不浸者三版城中巢居而處懸釜而炊襄子期韓康子魏桓子夜殺守堤吏而決水灌智伯軍救水而亂大敗朱彛尊記自智伯決此水以灌晉陽而宋太祖太宗率用其法定北漢蓋汾水勢與太原平而晉水高出汾水之上決汾之水不足以拔城惟合二水而後城可灌也五朝志太原有晉陽宮晉水宋太平興國中曹翰從征太

太原府志

卷九 山川

六

原攻西北築土山瞰城中軍中乏水城西十餘里谷中有娘子廟翰往禱之穿渠得水人馬以給宋熙寧八年七月太原府草澤史守一修晉祠水利喬宇晉祠記泉白懸甕山而出結二穴以泄穴廣二尺許因甃石池之溢泛爲溪北折而東瀾漫盈決渠穿澮引條經井絡用溉田疇方四十里相傳晉祠聖母姓柳氏金勝村人姑性嚴汲水甚艱道遇白衣乘馬者欲水飲馬柳不恡與之乘馬者授之以鞭令置甕底曰抽鞭則水自生柳歸母家其姑誤抽鞭水遂奔流不可止急呼柳至坐於甕上水乃安流今聖母座卽甕也元高昌傑玉立晉溪詩訪古晉溪水繞集汾水橋

澗河在縣東十五里源出榆次縣赤坑村流入縣境南畔



南墨窰等村至小店鎮入汾隸境凡十里有奇

洞渦水在縣東南三十里源出樂平縣榆次縣永康鎮西流入縣北格等村入汾隸縣境凡十里有奇 水經洞渦水又西到晉陽縣南西入於汾出晉水下口者也 水經注劉琨之爲并州也劉聰引兵邀擊之合戰於洞渦卽是水也 梁氏叔琮自太行入取澤潞出石會營於洞渦久之糧盡乃旋 宋李繼勲征太原與北漢戰於洞渦河大破之

蓮池在縣南五里蕭贊營晉水滙此民多植蓮

臺駘澤在縣南十里廣二十里晉水下流之所滙也一名晉澤中產蒲魚後汾水沫之胥爲民田其側有昌寧公廟卽臺駘神也 齊神武田於晉澤太常卿李元忠馬

太原府志

卷九 山川

七

倒良久乃蘇神武親自撫視

御井在縣西南十里近晉祠相傳宋太祖飲馬於此

蟾酥池在縣西南五里賢輔鄉元時採辦後涸

滴瀝泉在縣西南十里王索村古晉祠下 太原古志在王里村三十里

白龍池在縣西南三十里天龍寺深可丈許旱浚之則雨

桃坪溝在縣西南西山中

沙河水在縣西七里風峪中逢旱則涸遇夏則大水須築堤障之水經晉陽故城南隍東流入汾

九龍井在縣北三里金皇統八年碑人有疾飲之卽愈洗

目卽明

烈女井在縣北十里元武氏女管嬰殉此故名

白魚泉在縣西北十五里龍山明仙寺北谷泉出白魚因



名

龍泉在縣西北開化山南谷中有八角池泉繇石罅出

榆次縣

罕山在縣北五十里陽曲縣界圖經謂之看山自太行連絡而下層巒千里山獨偉特巔有雲則雨乃榆次之鎮山也東爲翼家山東南爲大方山中爲中林山和合寺寺迤西南爲小方山卧虎山又起爲龍王頭山饅頭山迤西爲草堆山南有龍池一名旱山地形志中都有榆次城壽陽城平譚城原過祠旱山 王系罕山浮圖疏晉國多山而盤紆窮鬱中都爲大中都之勢南平北險自北而南百餘里中岡陵起伏而蒼翠拔出罕山爲大懸泉谷在縣東南三十里牛坑村有牛坑水

太原府志

卷九

山川

六

榆城坂在縣東南三十里壁立數十仞上有土寨下有懸壑

麓臺山在縣東南三十五里高數十仞巔平衍故曰臺一名鹿蹄山上建智伯祠麓臺山有二榆次其一也地形志榆次有鹿臺山祠

神林嶺在縣東南三十五里陰寒積雪與寶峰山對峙寶峰山在縣東南四十里馬欄村蜿蜒偉特山之陽溪谷可玩下有龍池水最清澈

盤腸嶺在縣東南五十里山勢危峻盤曲如腸木瓜嶺在縣東南六十里有木瓜水

鷹山在縣東南八十里峰聳似鷹小涂水出焉小峪在縣北三十里有小峪口渠



烏金山在縣北四十里罕山西南中有龍池夏不涸冬不冰旁有文殊石方一丈餘位若天置上建水晶院逸人居之相傳文殊大士飲獅於此居民禱雨多應

紅砂山在烏金山東南十里峭壁密林砂石胥紅中有正壽寺其旁清泉瀆出流歸澗河

先峰山有壁壘遺址

撲牛山在陰山西

老鴉山在撲牛山西怪石峻嶒峰巒陡峻爲諸峰最

海螺山在大峪口西半里許上有洪聖寺

兔兒山在卧虎山東南二里

小五臺山在縣東北二十餘里舊志謂旁列林巒俯瞰泉

石爲居人遊賞地今林樹無存寺多古碑亦剝落不可

太原府志

卷九 山川

九

辨矣

八縛嶺魏書地形志作八賦嶺距縣一百里山勢環帶綿

延數里山之東南遼州和順其西爲栢翳山

曹家嶺長亘十餘里上有趙朶諸寨古避兵處

貓頭嶺明崇禎中知縣任濬勦土寇於此

漫天嶺三嶺相望勢俱險峻

神山在盤腸嶺東北三里其下溝水亦入大涂

栢翳山在八縛嶺西八里四壁陡峻高數十仞蹊徑僅可

容步亦名栢翳寨

三縣壙其西南屬太谷東南屬和順西北則榆次矣

帽帽山在栢翳山西北

架嶺嵐光霏結黛色參空備極秀偉之狀



青楊嶺綿亘十餘里在涂水之西土人稱爲大西山層巒起伏衆壑紆迴林木鬱茂四時皆青與南北諸山有中處聯絡之勢

紅羊山在青楊嶺西北五里相傳牧羊者陷羊穴中覓得之毛已盡赤蓋硃砂洞也再往遂失其所上有大小尖寨天然壁壘爲昔人避兵之所

杜家山在紅羊山西南十里石梯山南大羅山東長亘五里其東爲大塔峰金水河出焉

石梯嶺在白田村東鑿石爲蹬如梯然長十餘里

大羅山山勢平衍綿亘五里西南屬太谷縣東北屬榆次分水山在白田村西一里盛夏雨集水自山而下東北入涂東南入金水河西入圪塔河

太原府志

卷九 山川

三

鳳頭腦在段和莊北里許

魯仙山在白田村北五里西南距大羅山十五里東南望八縛神林諸嶺西北指寶峰鹿臺諸山俱朗若眉目上有古刹曰靈峰寺又名魯仙寺

神頭山相傳有智伯墓國人刻木爲首以葬故名與寶峰對峙舊志謂與寶峰並峙誤

南北蘭交嶺東南魯仙山西南神頭山俱距五里分峰岫立涂水經其中北蘭交之陽有石礦焉舊志謂蘭交之古墓也

紫巖山在什貼西北距縣六十里接壽陽境相傳唐李通元著華巖經論於此中有華巖寺其山松柏叢生遙望蔚秀蒜谷芹峪二水俱出其下



陰山在罕山少西南形勢險峻上有深洞土寨羅列爲先  
世屯兵之所

五太山在河口村西北二里下有五龍廟廟西有五龍河  
蒜谷在縣北四十里有蒜谷水流入澗河

卧虎山在罕山南積石巉巖狀若虎伏史稱李克用與振  
武軍將戰於卧虎山兵敗而退其故處也

冀家山在縣東北四十里其勢綿延環向爲罕山左翼  
大方山在冀家山西卧虎山北高數十仞四角隆起

中林山在大方山南卧虎山西草堆山東羣山中茂栢成  
林上建和合寺

小方山在大方山西南

草塚山在小方山西形表而勢積起似草成堆

太原府志

卷九 山川

三

饅頭山在草堆山南麓平廣而巔尖削

芹谷在縣東北五十里有芹谷水

殺熊嶺距縣十里宋節制使种師中敗於此或改呼王湖  
嶺

孫家山相傳明宏治十年山南移二十里云

洞渦水源出樂平縣西四十里陡泉嶺至平定州合浮化  
水西流至壽陽縣界土人名冷泉河合黑水經榆次東  
十五里合流村合大涂水又西五里合源渦水又西南  
流至太原縣北移村王名都注於汾水經注洞渦水又  
西蒲水南出蒲谷北流注於洞渦又西與原過水合

水經西過榆次縣南 水經注榆次縣故塗水鄉晉大  
夫智徐吾之邑也春秋昭公八年晉侯築虎祁之宮有



石言晉之魏榆服虔曰魏晉也榆州里名也漢書曰榆次十三州志以爲塗陽縣矣王莽之太原亭也縣南側水有鑿臺韓魏殺智伯瑤於其下其水又西南流經武觀城西北盧諶征艱賦曰逕武館之故郭問厥墮之遠近洞渦水又西南爲淳湖謂之洞渦津澤而塗水注之魏地形志同過水出木瓜嶺一出沾嶺一出大廉山一出原過祠下五水合道故曰同過西南入汾

源渦水在縣東八里源渦村其泉湧出隆寒不冰泉側草木經冬常榮又名爲溫泉上有龍祠唐貞觀二年縣令孫湛引以溉田南經半里許會洞渦入汾 按源渦水乃原過水之訛水經注洞渦又西與原過水合逕北便水流也水西阜上有原過祠蓋懷道協靈受書天使憂太原府志

卷九 山川

三

結宿情傳芳後日棟宇雖淪攢木猶茂故層巖水取名焉其水南流注於洞渦水也 一曰南流入涂蓋涂水至合流村與洞渦合可並稱也

社倉井在社倉西水甘淪茗甚美  
寒泉在縣東十里井谷村龍祠前土泉一穴甘冽不涸不溢清澄見底西注洞渦  
西塢溝水在縣東南十五里  
杜堡溝水在縣東南二十里清流峻坂又名牛耕水纏爲南北二渠

牛坑水源出縣東南三十里牛坑村懸泉谷西流入洞渦神井在縣東南五十里高平村北味甘冽里人以水盈縮卜歲豐歉



木瓜水源出東南六十里木瓜嶺下乃遼州舊平城縣界也西流二十里經八縛嶺下又名八縛水西流入洞渦周家井在縣東南水甘冽

小涂水發源東南八十里鷹山今縣人無識鷹山者考水入大涂者有二一出雁山圍子溝十五里至故庄又十里至王家庄又十里至石槽頭南入大涂水一出神山下孤神頭西流十里經千佛寺橋又西十二里經張家庄又五里經原家峪又西三里至石槽頭北亦入大涂水雁山神山距縣俱八十里許舊志所指小涂二水未知孰是姑並存之以備考

大涂水發源東南百二十里八縛嶺西北流至斛城舖合小涂水又西北至仁吾舖西流經溝口舖中莊舖石圪太原府志

卷九 山川

三

塔南蘭交至南北合流村合洞渦水又西流入達村源渦村合源渦水又西爲萬春渠又西過八家崖分支爲王村渠小東關渠橙槽渠楊村渠又分支爲永康渠又分支爲張慶渠又分支爲演武渠又分支爲懷仁渠又分支爲王郝渠雖洞渦大涂合流而榆次諸渠以涂水爲主水經注涂水出陽邑東北大嶸山涂谷西南逕蘿磬亭南與蔣谷水合水出縣東南蔣谿水自蔣谿西北流西逕箕城北春秋僖公三十三年晉人敗狄於箕杜預釋地曰城在陽邑南水北卽陽邑縣故城也竹書紀年蔣溪又西合涂水亂流西北入洞渦澤

長寧水魏地形志榆次有長寧水西北合同過縣志郡志俱逸其名而縣志以爲世代推移則名變易大小涂水



卽爲長寧今考小涂水流入大涂至合流村與洞渦水合榆次諸渠俱以涂水爲主水經注涂水出陽邑東北大曠山涂谷南與蔣谷水合至長寧水又注云迤西與原過水合是二水犁然各別不得以大小涂水卽指爲長寧水也今據通志於大小涂水之後增入之八縛水源出八縛嶺下西流至傾城西會木瓜水金水河在縣西南三十里源出太谷縣西流經縣東陽鎮入徐溝縣界

馬家厓井在縣西北隅水甘

澗河水在縣北十五里源出壽陽李家山西南流經太原縣境入於汾宋時縣令桑世安引以灌田今下流多涸必霖雨大集山水漲發河流始盛能達於汾

太原府志

卷九

山川

書

清水河一名寺峪河出城北五十里罕山下西南行歷東溝平地泉大峪口小峪口諸村俱穿山谷間諸溝霖水以次畢注而清水則至大峪口南伏流由小峪口南經流村入歡渠口又南經鳴謙驛東而伏流復出稍西南行經至村凡三十五里入於澗河 接舊志清水河源出孟家井謬

蒜谷水源出縣北四十里蒜谷合芹峪水西流五里入澗河

蘇河水發源縣北四十里高壁溝西流入澗河

黃龍港在縣東北半里漢唐時故道也邑霖潦滙此疏爲港

白龍河源出縣東北二十五里白龍溝西流合壑頭溝水



入澗河

小五臺山有二泉神主之禱雨者各投瓶取而合驗以卜雨數張養廬山寺記榆石良方越城二十餘里小五臺廬山寺北礪罕山南帶涂河東望海波西眺龍門林巒泉石號勝遊地

大佛溝在縣東北四十里柏林頭壑廻岡抱

後溝水出烏金紅砂冀家山諸溝之水至後溝合爲後溝水南流入澗河

鞋底嶺水出烏金山南鞋底嶺溝南流入澗河

東溝河卽舊志所謂沙河也出中林山下合世佛溝羊溝龍池溝諸水流至鳴謙驛西七里故又稱七里河西南流入太原地

太原府志

卷九 山川

三五

磚井河草梁饅頭山下諸溝之水至劉家嘴泉派會合南流經土地坡又西南流入太原地

五龍河出五太山下過磚井村西西南流入太原地

芹谷水源出縣東北五十里芹谷西北合澗河水

龍池有四一在小五臺山下一在罕山南一在孟家井東一在中社村西水胥清瑩冬夏不竭有龍祠歲旱禱雨輒應

圪塔河起縣東南六十里西窪村西二里許西行經子中平歷麻地溝至施家橋卽通志所稱華豹溝水是也西行爲圪塔河溝此水不與洞渦通府志未載

北合流水出村東龍祠下南行注洞渦

東趙河出東趙村西北石家坡經小五臺南入洞渦



下峪河源發十里溝經辛置東河後溝東北四十里栢林頭大佛溝水來合之又有李方水出李方村北神祠下每水漲泉湧流入下峪河下峪挾之同入焉

太谷縣

鳳凰山在縣南十里高五里盤踞四十里巔勢似鳳秀巒抹靛爲陽邑之鎮山上有浮圖三座空王佛殿下有白將軍廟東二里山麓有三佛閣有龍泉耐泉

奄谷在縣東南十五里袤四十里東崖石壁有佛像名千佛崖谷中有水流合象谷水 初旦遊磨龕寺記太谷南二十里有奄谷口路裁成蹊又十里亂石怒濤聳如激如又五里經斷梁皆懸崖邃澗行數里始達寺寺在山半因其勢而磨之厥形若龕前臨陡隍憑闌俯視羣

太原府志

卷九 山川

三六

山皆小

鳳景山在縣東南十八里高三里盤踞十餘里巔有浮圖灰泉山在縣東南二十里高二里盤踞十里山上有谷德將軍廟廟下有泉瀦爲池名灰泉山池明一統志池上有亭在焉

鳳翼山在縣東南二十三里高三里盤踞二十里卽鳳凰山之右翼也有二佛閣金時毀元重建

四卦谷在縣東南二十五里袤二十里谷中有泉分流四派

石馬嶺在縣東南三十里石似馬

藥伯山在縣東南三十里高二里盤踞十里有藥伯廟

松嶺在縣東南三十里繇奄谷入形高松茂曉日滂雲殊



似蜃樓下有巖東數十武就崖建磨龕寺下臨千仞俯  
瞰溪流

回馬谷在縣東南三十里袤二十里谷中有馬陵關通古  
邢州路五代時梁伐太原刺史張歸厚軍自馬陵關入  
卽此處也產葡萄味甚美

馬嶺在縣東南七十里路通直隸順德府元好問有詩  
龍門壑在鳳凰山西與大佛山胥名鳳翼

咸陽谷在縣南十五里袤十里山上有源泉流出谷名咸  
陽水西合回馬水 城壕記秦代趙築城近谷口以咸  
陽兵戍之故名

白璧嶺在縣南七十里魏地形志陽邑有白璧嶺

馬明王谷在城南有河

太原府志

卷九

山川

三七

大佛山在鳳凰山東

黃土谷在馬明王谷東

太谷在縣西南隋改縣爲太谷以谷名

胡谷在縣西南有河

猪谷在縣西南有渠

蔡谷在咸陽谷西南

龍岡在縣東北五里蜿蟺綿亘將雨則烟雲噴薄

象谷在縣東北五十二里廣三百步袤四十六里谷中有

水卽象谷河 後魏正光三年六月并州靜林寺僧在

陽邑城西象谷掘藥得玉璧五珪十印一玉柱一玉蓋

一並以獻

蔣谷在象谷旁

魏土地記晉陽東南百十里至山有蔣



谷大道度軒車嶺通於武鄉谷有水自蔣谿西北流西  
逕箕城北春秋晉敗狄於箕卽此又西合涂水亂流西  
北入洞渦澤

大塔山在縣東北有金水河

八表山

見地  
形志

奄谷河在縣東南十里谷中有泉北流經城東石象舖又  
北合回馬河

回馬河卽烏馬河在縣東南二十五里源出榆社黃花嶺  
下西流至谷又西合奄谷咸陽谷水又西經清源祁縣  
注於汾

城南河在城下源出馬明王谷至城下西流散漫明嘉靖  
二十三年以築城改南五里合咸陽谷河今復故道

太原府志

卷九 山川

三

耐泉在縣南十里源出鳳凰山下瀦爲二池味甘宜釀酒  
北流溉稻田西北合咸陽谷水

蓮花池 栲栳池 聖母池胥在耐泉側淨若鑑照人無  
匿髮輕風感之作青羅紋紙痕荇藻紛披鳧鷖唼喋

龍泉在縣南十里鳳凰山下味甘可點茗石渠屈曲亦可  
流觴

咸陽谷水在縣南十五里源出咸陽谷山上涓流出谷西

合回馬谷水

明一統志奄谷咸陽  
谷石壁俱有佛像

胡谷河在縣西南西北流入祁縣界

象谷河在縣東北二十五里源出榆社恤張嶺下西經縣  
城西北流入清源鄉界澄澈可鑑

金水河在縣東北源出大塔山下至石母祠衆泉合經榆



次縣東陽鎮徐溝縣山道村西北合象谷水經清源鄉  
羅白村入汾

祁縣

麓臺山在縣東南六十里南跨平遙縣界迤邐接武鄉沁  
源靈石縣界高八里盤踞三十里形似臺一名頂山又  
名蒙山又名竭方山有宋張商英麓臺銘

龍洞在麓臺山龍王廟中深四丈強洞口時有風雨氣近  
之寒悸洞齶嵌空分四小洞正北一窩是爲潛宅卽龍  
王洞內有水池細橫三木朽似不勝梁實爾精材過此  
則霜芽雪筍肥乳泉矣南二小洞一則太子據之蓋龍  
孫也一則潤濟侯據之水凝石滴胥傳爲昭餘祁之神  
禱雨輒應東南轉一洞幽不可測大都粘雲觸霧胥帶

太原府志

卷九

山川

五

龍腥無敢深入

南原在縣東南南閭漫胡累大安南等都東西約二十餘里  
南北十里 宜麥

伏巖嶺在縣東南三十里

上幘山在縣東南六十里高五里盤踞五里巍峩奇秀上  
有五龍堂

下幘山在縣東南六十里高三里盤踞五里上有幽仙寺  
上幘下幘東接太谷南接武鄉晴巒朗岫下臨風雨石  
樹和合巖嵒葱蔚有五龍二池

墜鐘崖在下幘山宋宣和中幽仙寺諸仙禪師遊汴徽宗  
詔入朝設宴不食上問之對曰聞本寺鐘響方食頃之  
果聞鐘聲上遣兵衛取其鐘鐘絕紐飛去西崖下半入



地不可起遂名爲墜鐘崖

高峰壑山在上嶺山東十餘里一名雲伏腦山分二支轉而東北者爲綿嶺自麓十八盤始至巔轉而北者爲龍山首有龍嘴 山巔積雪不化有雙泉志稱竹綠水崖花紅霜障

四縣腦山在嶺山東南三十餘里形勢峻廣陟巔見祁縣太谷榆社平遙四縣故名

牛心山在縣東南七十里遞高六里盤踞四里水泉四匝峰巒特秀巔尖圓似牛心

紫荊山在牛心山南距縣百餘里山最高袤十里石多五色西崖有赤土洞巔有泉池西巖有銀洞今閉西北山梁下有風洞

太原府志

卷九

山川

三

溫風嶺在縣東南百里紫金山北巔有張果老窰下有天井仙峰槽蹄諸蹟

雙臺坡在縣東南梁村東雙臺對峙

黃羊坡在縣東南窰上村相傳楊六郎行兵至此迷失道有黃羊引之故名

雙泉山在縣南三十里子洪鎮南山有雙泉故名

石夫子洞在雙泉山石崖中內有夫子像明嘉靖中鑿洞南一里有石似龍鴉嘴

石佛崖在子洪鎮南子洪上渠下渠自崖而分

胡甲水源出東南百六十里武鄉縣胡甲山北流經龍舟谷名龍舟水滙諸泉折而西流經縣北又西經平遙界入於汾名昌源河 盤陀一川沿溯龍舟谷水峪村北



關其聚落也東巖一潭寒泓淨拭下流多沙土人名沙河斛水斗泥銹雲鋪雨水經行處人多種竹雲梢不碧而白似太始雪 水經注侯甲水發源平遙縣胡甲山有長坂謂之胡甲嶺卽劉歆遂初賦所謂越侯甲而長驅者也蔡邕曰侯甲亦邑名也在祁縣侯甲水又西北歷宜歲郊逕太谷謂之太谷水出谷西北流逕祁縣故城南自縣連延西接鄔澤是謂祁藪也卽爾雅所謂昭餘祁矣賈辛邑也辛貌醜妻不爲言與之如臯射雉雙中之則笑也王莽之永縣也莽地形志祁有祁城祁奚墓周黨冢太谷水趙襄子城

昭餘池在縣東南七里祁城村周禮昭餘祁卽此久涸元至元十一年濬水爲昭餘池卽其地立成湯祠後池復

太原府志

卷九

山川

三

涸

國朝順治九年復盈 何濟時昭餘祁考池在祠之前後左右明嘉靖初知縣楊西波乃鑿於祠之東南一里許則非其地矣 顏師古註昭餘祁在太原鄔縣

義井在縣東南元義門溫義之井

滿井在縣東南十五里閣漫村水神溝冬夏恒流

伏羆水源出縣東南三十里伏羆嶺流經王斜村東名王斜河北入昌源河

石佛河源出縣東南四十里柏園村南坡下流至下申諸村漫散

通光水源出東南幘山北上莊東南溝中流出谷口蓋以太谷縣胡城谷水北流經縣東東管諸村名胡溪河至



西北合昌源河入汾 舊志出縣東南四十里胡城谷  
中北流一名胡城水

五龍池在幘山五龍堂前東西各一

迴馬谷水一名五馬河源出太谷縣東南迴馬谷流經縣  
北西合昌源河入汾

馬跑泉有三二在麓臺山神祠南北俗傳卽麓臺神馬所  
跑或謂宋太宗取河東時路經此地御馬所跑一在上  
幘山東俗傳康皇后曾沐髮於此

子洪池在子洪鎮南山麓周圍石砌水甘

雙泉有二一在子洪鎮南雙泉山流入溝灌田一在高峰  
壑山流入通光水

甄拔突泉二胥在南梁上莊東南溝中通光水之上流也

太原府志

卷九 山川

三

三大井在縣東北隅鑿於建城之後味甘

感應泉在新韓鎮後涸

海眼在馬射灣距城三十里水出其下冬不涸上建水母  
廟李公自問有長嘯樓讀書處

徐溝縣

馬鞍山在清源故城西南五里高七百四十步橫三百十  
五步至鳳山二里半

方山在清源故城西南二十五里高七百九十步橫四百  
步西至交城縣壺屏石山界四里北至馬鞍山十六里

白石山在清源故城西五里高七百六十步白石溝袤二  
十里北至中隱山四里半有水由峪中出合平泉曲流  
十里入汾夏秋泛漲直衝清源城西關築白石堰以障



之弊費滋甚康熙十六年春山水改道而南由西南流  
十甲東行入於汾秋水潰溢去清源城十餘里民得紓  
修堰之役者四十餘年後復由清源東北曲流入汾二  
十二里山堂肆考白石谷在太原府清源縣西白石山  
谷水流出合平泉入汾三晉多山谷而梗陽白石谷獨  
流布於東南藝苑之卷帙焉

鳳山在清源故城西七里高八百步橫三百九十步至白  
石山三里半中峰高峙雙翼如抱

屠各谷在清源故城西十五里兩山夾峙陡峻如峽

馬名山在清源故城西十五里高八百十步橫四百二十  
步在鳳山白石山中漢文帝牧馬於此有印駒城

壺屏石山在清源故城西二十八里高白鎮交城夏營村

太原府志

卷九

山川

三

界有壺屏石河

中隱山在清源故城西北八里高七百八十五步盤踞三  
百七十步北至仁山三里半四周高峰其山中隱碧澗  
潏繞水中文石可數有中隱寺

仁山在清源故城西北十里高七百五十步橫三百二十  
步北至太原縣洞兒溝山界三里

賈家山明嘉靖七年九月山塌數十丈

金水河在縣境東十里源出太谷大塔山經榆次縣東陽  
鎮西南入縣境集義諸村漫流秋水大發時斷行旅四  
季多涸土砂水齧沈崑記徐三水散爲嘉平禿尾諸  
渠洞渦嶮峪支分不一而金水河從大塔遠出城下數  
十里安流如故



嶮峪河在縣南八里繇太谷縣西入縣境李青村楚王村清德村內道村宜武村高花村流至清源鄉舊在縣南十里明季移北五里三秋漲水時發春夏則涸

洞渦河在縣北八里土人名淤泥小河經榆次縣永康鎮先在太原縣北格等村西流今移縣境良隆村遼西村劉村同戈村白樹村董家營王答村龍家營黑石屯等村流至清源鄉

汾河在清源鄉東五里水經南經梗陽故城東

涂水在清源鄉東南三十里自太原縣界西南入汾與洞渦水合水經汾水過晉陽縣又南洞渦水東流注之注汾水又南經梗陽縣故城東故榆次之梗陽縣也今太原晉陽縣四十里榆次界有梗陽地汾水又南卽洞

太原府志

卷九

山川

三

渦水會者也

象谷水在清源鄉東南三十里至榆次縣界西北流入祁縣界

屠溝水在清源鄉西南十五里卽屠谷口也兩山陡峻如峽夏多泛漲冬則涸

白石水在清源鄉西五里源出白石峪曲流十里南入汾夏秋遇雨泛漲甚爲民害因修石堰障之

壺屏石河在清源鄉西二十八里流入交城界

清源水在清源鄉北五里源出西山趙簡子祠前平地湧出清可鑿髮一名平泉一名不老池東南入汾清源舊名縣取此通典有清源水舊唐志清源隋於古梗陽城置清源縣以水爲名



東湖在清源鄉東南北三面臨城廣居鄉城之半有水門通灌稼渠以達汾 東湖記縣故無湖湖所占者悉平壤曩時白石水漲不以時疏導悉歸城東低下處外障於垣牆而內益以泉水故水日聚而成湖 祝志不載是時尚未有湖也

芹馥泉在清源鄉學宮前東注東湖

### 交城縣

卦山在縣西北五里遶高五里盤踞七十里西北連夏壇山山八峰爻象峰最高巔西巖下石坎有靈泉山西石坎有龍池泉山南石崖下有漿水泉山下有寺義水一名萬卦山祝志作萬掛山六峰峙立唐建華嚴三會普光明殿今爲十方天寧寺

明一統志止記六峰

武攀龍修石路記

### 太原府志

#### 卷九

山川

三

太極一峰而下雨山迴合岡阜層列八卦六爻皆具目下 朱彞尊遊卦山題名記卦山去交城縣西北五里連峰夾礪若卦畫之相錯陰陽乖合不可端倪山以是名陋者增益其文曰萬卦山而卦之義反以數窮矣丙午秋予登是山觀唐支高李元穆所撰碑記及貞元元和中陀羅尼石幢日將暮風雨驟作乃留宿僧舍曉起登峰以望白雲蓬蓬瀾漲柏谷下視城郭出沒霧中若方艦之浮於海午霽下山因書來游之歲月於壁包子歌曰繫予馬於城隅兮攬子袪於山幽微子之書兮後之來者夫孰知予之偕游予不復和也

石壁山在縣西北二十里疊巘周環拱列如壁南有石崖峭削百仞西北巖下有龍潭泉東南崖半有白牛洞唐



建石壁禪寺甘露義壇李逢吉碑三壇角於三都在西  
都曰靈感壇在東都曰會善壇在北都曰甘露壇今爲  
永寧寺又林諤頌舊號石壁谷又名甘山一名龍山  
魏太和六年唐貞觀十一年元和七年甘露胥降於

石壁山 林諤撰石壁寺鐵彌勒像頌序房璘妻高氏  
書碑序曰石壁寺者晉之西山舊號石壁谷隋隸西壽  
陽縣唐改壽陽爲文水先朝分置交城而立寺焉太宗  
昔幸北京文德后輦過蘭若禮謁禪師綽公便解衆寶  
名珍供養啟願玉衣旋復金榜遂開因詔天下名山形  
勝皆表刹焉所以報護力廣真諦也特起紺臺之制頗  
餘紫禁之恩禪師守終官寺初建分身建塔遺跡巋然

金章宗遊龍山詩金色界中兜率境碧蓮花裏梵王

太原府志

卷九

山川

三

宮 趙點詩路轉八九里雲藏四五峰

孝文山在縣西北百六十里靜樂縣西北五十里元魏孝  
文帝嘗避暑於此有廟

穀積山在縣西北百五十里接永寧州呂梁山界一名骨

集山縣志卽作呂梁山

羊腸山在縣東北百二十里後魏羊腸塞卽此 隋書崔

頤字祖濬博陵人大業時從駕登太行詔問何處有羊  
腸坂對曰臣按漢書地理志上黨壺關縣有羊腸坂上  
曰不是又答曰臣按皇甫士安撰地書云太原北九十  
里有羊腸坂上曰是也因謂牛宏曰崔祖濬所謂聞一  
知二 水經注漢高帝十年封靳彊爲侯國後立屯農  
積粟在斯謂之羊腸倉山有羊腸坂在晉陽西北石縈



委若羊腸焉故倉坂胥取此名 通典靜樂有羊腸山  
隋煬帝改爲深谷嶺又嵐州宜芳縣有古秀容城卽漢  
汾陽縣屬太原郡積粟所在謂之羊腸倉是靜樂萬根  
谷後魏隸秀容也 山堂肆考羊腸山在山西太原府  
交城縣東北郡國志萬根谷石磴縈委若羊腸然後魏  
於此立羊腸倉 萬根谷下有石壚 元和志羊腸山  
在交城縣東南五十三里是繇交城故繇言也  
寶珍山在縣西百里僧寶珍蛻此

錦屏山在西北五里東連卦山紅崖綠樹若錦屏然  
夏壇山在卦山西北

白牛洞在石壁山東溝東南崖半洞北向洞口高一丈廣  
五尺深不可測

太原府志

卷九

山川

三

高離山在縣西北四十里孤峰高出遠離培塿

西社龍門在縣西北五十里西南都景殊清麗昔有巨石  
當山口夜倏迅雷石裂水通

馬鞍山在縣西北五十里連峰似鞍邑鎮山也上有晉大  
夫狐突及子毛偃墓祠峻嶒峭拔盤旋萬峰一名狐突

山土人名放馬坪

山產青鐵  
下有靈泉

文谷在馬鞍山後有文谷水

步渾谷在馬鞍山前步渾水源北

少陽山在縣西北七十里山海經少陽之山酸水出焉今  
水微酸流合文谷水舊產銀精石 水經注南與酸水

合水源西出少陽之山東南流注於汾水汾水又南出  
山東南流則酸水當在陽曲烈石口上



青龍洞在縣西北七十里水北都榆羣村洞邃數里繇石窟入禱雨多應

龍堂巖在縣西北七十里水北都山下有龍王堂

文山在縣西北九十里文水側

四稜山在縣西北九十里山脊四垂

寶珠山在文山西北十里

載明一統志

龍鬚山在縣西北百二十里高五里盤踞十九里北連孔

河嶺靜樂縣山界山有三峰盤蛇峰最高嶺有寨名龍

鬚寨北有黑龍祠南有龍堂山山下滴水成石名餘涼

石山麓有青崖水一名龍樹山

孔嶺在龍鬚山北

大阿蘇山在縣西北百五十里

太原府志

卷九 山川

三

小阿蘇山在大阿蘇山南數里石崖有洞穴相傳張果老

乘白驢以鐵箠指石爲穴併驢入此今穴邃數十武

黑石樓山在縣西北百五十里永寧州界上有黑石如樓

故名

破羅漢山接黑石樓山

采屏山在縣西北百五十里懸崖如削五色繽紛土人不

知其名

國朝康熙初知縣趙

得斷碑於澗中上有采屏二字

因以名山

豁然山在縣西北百五十里連穀積山山勢聳立古有隱

士東望并州西望黃河襟抱豁然一名歡悅山

獨泉山在縣西北一百五十里洞穴中有石如盆泉水出



焉

福泉山在縣西北百七十里有福泉禱雨輒應

煉銀山在縣西北百七十里

劉王嶂山在縣西北百九十里高八里盤踞二十二里西連榆城山臨縣界山有峰淵峪峰最高上有泉禱雨多應山下有離石水流入永寧州昔劉淵都離石時嘗居此因名有祠又有西谷水流入交城

榆城山在劉王嶂西南西谷水經流其下西谷在劉王嶂西

三座崖在縣西北峙東西兩葫蘆口中

鳩鴿二祖崖在石壁山龍堂宋釋龍潭居石壁寺有鳩鴿

聽經轉生縣北坡底村榮氏從師苦修於寺北溝西崖

太原府志

卷九

山川

三

下卽龍堂也後胥化此名鳩鴿二祖崖東坡有石菴顯跡

童子谷在縣北八十里北齊天保七年有童子羣牧於谷見巨石如人因獲浮屠像高一百十丈

交城山在縣北百里交城故縣治此今爲故交村 舊唐

志交城隋分晉陽縣置取縣西北古交城爲名初治交

山天授元年移治却波村

卧牛山在縣東北七里以形似名

白鹿山在縣東北十里下有白鹿泉

玉山在縣東北十二里古名虎頭山金皇統二年賜名或

謂有空王佛寺故也有第一碑宋米芾書

七佛巖在縣東北二十里山巖有七佛像



卧虎山在縣東北二十五里有卧虎巖相傳梵王太子繇盤陀石來及七帝修覺地其睡化金骨虎石足蹟今存塔莎谷在縣東北五十里有塔莎水

神師山在縣東北百九十里古有二仙隱此下有東西仙

### 洞二

汾河繇靜樂南流入縣北境百里故交村及汾孔交流地也隸縣境三十一里又東流入陽曲太原徐溝縣境復流入縣東南境十五里鄭村過大陵城合渾峪水又南流入文水縣隸縣境又三十里水經注汾水又南逕汾陽縣故城東川土寬平峘山夷水故地理志汾水出汾陽縣北山西南流者也

沙河在東門外接磁窰坡底卦山諸河實無河也

太原府志

卷九 山川

旱

月波湖在縣城東南隅周二里一名却月湖面平如鏡樓

### 臺掩映

南河在縣南八里土人名秃尾河夏秋時漲

瓦窰河在縣西北五里卽步渾水下流也

國朝康熙二年磁窰瓦窰二水交流北門圮七年壘石築堤障水南流三十五年堤潰城復圮旋加修治四十六年夏雨驟水發直衝城內東南兩關次年重築堤袤八十丈有奇高二丈

文谷水在縣西北源出馬鞍山後流入汾水泉灘在西涯

步渾水在縣西北源出馬鞍山前步渾谷流經瓦窰溝至

### 城東流入汾

渾谷水在縣西北源出孝文山後南流經文水縣峪口開



柵二村入汾古浚二渠

觀音泉在縣西北八十里西冶村

西谷水在縣西北源出劉王嶂南流至榆城合渾谷水

狐神祠并在城北水甘禱雨靈驗

孔河在縣北百三十里源出龍樹山下青崖寨東流經板

柵屯蘭馬蘭村東注於汾

明一統志出東北塔  
莎谷南流入汾宜覈

磁窰河在縣東北五里即塔莎水下流也

塔莎水在縣東北五十里源出塔莎谷南流經縣東南入

汾元至正七年築堤障之今廢

漿水泉在卦山南石崖下

龍池泉在卦山西方丈石坎下

靈泉在卦山巔石佛堂西巖下石坎流出冬夏不涸

太原府志

卷九 山川

聖

龍潭泉在石壁山西北巖下僧龍潭棲此

白鹿泉在玉山麓一名冰泉

元真觀并在城西北隅水極甘冽

文水縣

隱堂山在縣西南二十五里一名子夏山子夏退老西河

嘗憩此有石窟名隱堂洞山陽建廟一名商山山壑峭

立有泉隱而不恒流一名隱泉山東又有馬跑泉西數

里有石門

隱堂洞在隱堂山隈去地百丈有奇躡石棧而上洞邃四

丈有奇高三丈有奇洞內一窟方廣一丈有奇土人相

傳通陝西又有風聲似輕雷洞前石壁拔立千仞夏秋

飛泉瀉落似一匹練一名子夏室 河南廟碑卜公結



廬於陶山之麓不踰歲民去其陋石窟之虎渡河而北盤紆之泉潏潏之流澆灌民田三十餘曠西河之民大蒙其德可作商山備考

石門在隱堂山西兩壁峭削似雙闕然澗水下注如噴雪走虬

獅子山在縣西南十五里以形似名

白虎山在縣西南二十里昔有白虎穴於此故名併立白虎廟

光統頭山在縣西南三十里峰嶺高峻日出光照或曰漢光武嘗統兵於此故一峰有先鋒臺之名今土人名西頂山勢邃曲松栢叢蔚

龍堂山在縣西五里右有白水泉味尤甘一名龍王山郭太原府志

卷九 山川

聖

趙宗廟碑距城七里四山疊出山之腰有古龍王廟俯臨深谷少折而西蜿蜒十武有泉一泓由石罅流出冽而甘

陶山在縣西二十里表亘蜿蜒羣巖競秀或曰唐帝嘗憩此

雙峰山卽陶山之分支也兩峰繚麓至巔壁立千仞土人名大嶺山

石峽山在縣西二十五里山谷杳邃初入爲靛頭山

靛頭山卽石峽山之麓也夾坡古柏逶迤而入石壁如削有石夾洞

石夾洞石壁插天崖半有洞古藏陶淵明白蓮社文金剛科儀諸書兩壁胥植含桃越巔西南十里有奇至黃龍



洞

黃龍洞洞殊幽邃禱雨輒應

熊耳山在縣西北三十里形似熊耳松栢蒙翳一名崇山  
上有牡丹李學詩記西北距縣三十里有山曰熊耳  
以狀類因名焉峭然壁立高超漢斗二水環帶於東三  
峰排戟於西南則商峰北則狐嶺乃西晉名山也山脇  
有熊耳寺佛前牡丹一株穿石而生不類凡種

栢茆山在縣北十三里巖崿森蔚上有壽寧怪栢

文峪在縣北二十里文峪口兩峰相距一里落葉較晚所  
謂谷口秋風也

郝嶺在徐南都上有長括

汾河在縣東五十里繇交城南流入縣境舊從北安都折

太原府志

卷九

山川

聖

而西歷河南都入汾陽縣境 明萬歷三十九年河東

遷從縣韓武西都入縣境流經東南齊南都入平遙縣

境歷靈石縣西南流 又歷石侯武良東城南賢青高

下曲永樂諸村西南流入汾陽縣界 嘉靖二十九年

汾河西徙三十二年汾河文谷河胥徙 水經又南過

大陵縣東 水經注昔趙武靈王遊大陵夢處女鼓琴

而歌想見其人吳廣進孟姚焉卽於此縣也王莽改曰

大寧矣汾水於縣左迤爲鄔澤

國朝雍正七年青高村至尹家社開引渠二道東城村自

闢河廣十丈至數十丈有差袤二十有五里

迴馬河在縣東五十里源出榆次縣繇清源鄉流至縣韓

武東伯高車都南合沙河



伯魚泊在縣東南二十里後澗

沙河在縣東南四十里源出祁縣南豐流至縣雲周村胡

家堡南入於汾

武滂泊在縣南二十里唐天授二年改名朱雀泊後澗

甘泉在縣西南二十里甘泉寺右池方廣一丈有奇水殊

清甘

馬跑泉在隱堂洞東

白水泉在龍堂山味甘禱雨多應

泌水在縣北八里龍泉村北繇東南注文峪河平地湧出

太平寰宇記謂之神福泉禱雨多應 五朝志文水有

文水泌水通典

文峪河在縣北二十里源出永寧州孝文山一出交城縣

太原府志

卷九 山川

四

西山半崖龍口一出縣土安都泊泊河三水匯流繇文

峪口開柵鎮東南流至石永都入於汾 水經文水出

大陵縣西山文谷東到其縣屈南到平陶縣東北東入

於汾 水經注文水逕大陵縣故城西而南流有泌水

注之縣西南山下武氏穿井給養井至幽深後一朝水

溢平流東南注文水又南逕平陶縣之故城東西逕其

城內南流出郭王莽更曰多穰也 文水又南逕縣右

會隱泉口水 元石為稽文水龍堂記西谷之水其水

多文因以名焉

猷水在縣東北二十里武陵村西古大陵城東南平地湧

出周十里有奇後澗

白石河在縣東北三十里源出清源鄉白石山西流經縣



武安都西南入於汾

隱泉在高山麓泉不恒流春水獨盛 河南廟碑文水縣  
迤南五里鄉名樂村卽古西河地也乃隱泉之所經泉  
流至是而澄清可濯故曰清泉

岢嵐州

岢嵐山卽管涔山蘆芽山也在州北百里山之陽名管涔  
山寧武縣界其北隸州境者高六里盤踞二十五里爲  
州南山西南連乏馬嶺山有七峰土人胥名南山山之  
陰名蘆芽山五寨縣界其南隸州境者高八里盤踞三  
十五里爲州北山西北連霸王山懸崖陡澗一綫羊腸  
山有十一峰土人胥名北山 舊志云二山上多勝境  
明季流寇盤踞寺宇灰燼 山海經管涔之山汾水出

太原府志

卷九 山川

五

焉

東山在州東半里接北山

長城山在州東三里下有白龍泉流合嵐漪水甚味甘  
十里崖在州東十里高二丈形似飛甍行旅時避雨焉  
乏馬嶺在州東五十里嵐縣西北八十里崎嶇難行  
南山在州南一里迤邐蟠踞與漪水胥襟帶州城

寺溝會在州南三十里石壁峭拔清泉縈繞上有白勝菴  
地以溝名而溝側實山也溝其識也 袁鏘珩白勝菴  
記在寺溝會之北踰河入谷口裁數武遵南麓以登徑  
甚窄轉而北水流涓涓北山胥絕壁若矛倚若竹挺若  
罌罌值菴門外清泉 泓紺碧菴南茂林蒨密西訪龍  
巖寺蹟先是有水如臂繇石袴間歛出以半木聯綴十



丈許懸空東流乃飛注澗中沙門埒塞之今則穿石縫珠走星竄沿磴而下矣西顧卽巖壑盡處奇拔不減北屏寺趾掌大宜臺宜洞東南松千章間復橫斜逼真繪事

西山在州西南一里有雲際寺翠嶼蒼岩石徑茂樹

龍巖在州西南

巨麓嶺在州西南五十里興縣東北六十里高七里盤踞三十里東麓爲州西山西南連萬松嶺山有十峰土人胥名西山一名萬松嶺

西豹峪在州西

旛竿山在州西北七十里

霸王山在州西北七十里產石炭

太原府志

卷九 山川

巽

水峪在州西北

天馬山在城北一里

北山在州北二十里

雲山在州東北四十里舊志卽嵐谷故縣也與岢嵐山接雪山在嵐谷廢縣東北四十里荷葉坪東西二山勢極峻險盛暑猶棲餘雪下有萬年冰與岢嵐山相接乃五寨之界也

荷葉坪在州東北六十里高四里盤踞二十里接寧化五寨界山巔圓整如荷葉山有九峰表亘靜樂嵐縣諸山土人名東山

蛇峪

燠水潭在州東二里許隆冬不冰溫泉漱玉卽此



蒙泉在東山澗下與龍王堂泉合流

馬跑泉在州東五十里泉類馬蹄相傳尉遲敬德蹟

黃道川水在州東入漪水

三角城水在黃道川西入漪水

漪水發源州東南之馬嶺西之直道村匯黃道川三角城

水爲一經城東甄堡東轉而南西流經陳寧寨隸縣境

共九十里南入興縣界 州志漪水環其東南砂河帶

於西北一名嵐漪河

砂河在城北五十里納會村繞城西南流合漪水

名源水在州北五十里東南入河

龍王堂河在州東北二里出東郊北山下水甘合東澗下

蒙泉明宏治間引入城

太原府志

卷九 山川

七

仙人澗在荷葉坪下

白龍泉在長城山下流合嵐漪河水殊甘夏寒冬溫

嵐縣

銅鼓山在縣南五十里遞高十五里盤踞五十里山中一

峰高五里連聖窰山仙人洞其色黃似銅履之有聲

赤堅嶺在縣南九十里遞高二十里盤踞八十里嶺下有

水流入靜樂縣界靜遊村

風后山在縣東南上有魏皇姑墓

桃尖山在縣東南六十里遞高十五里盤踞六十里連北

廟山

仙人洞在縣南六十里

黃嶮山在縣西南二十五里高五里盤踞三十里連西坡



梁一名黃芊山

白龍山在縣西南五十里高二十里盤踞九十里連小萬村有聖水井明英宗在塞外有老人送飯問之曰嵐縣白龍神也後封靈潤侯賜二祭

大萬山在縣西南六十里遞高二十五里盤踞九十五里連翠巖山下有白龍池禱雨輒應

翠巖山在縣西南七十里遞高二十里盤踞八十里連大萬山

灰灰嶺在縣西南百里

燒炭山在縣西少北

十八盤山在縣西北二十里遞高十里盤踞四十里連直奪峪山

太原府志

卷九 山川

栗

野雞尖山在縣西北二十五里遞高十五里盤踞五十里連十八盤山

乏馬嶺在縣西北七十里高五里盤踞二十里接岢嵐州崎嶇難行卽宋熙寧時飛鶯堡

聖窰洞 蛇洞 銅洞 胥在縣北十里銅爛溝中後銅盡名銅家塢

二郎山在縣北二十里

雙松樹山在縣北四十里上有雙松縣志桃峯鎮其南雙松障其北東帶高平之坡西據白龍之險山岡陡峻道

路崎嶇

鹿徑嶺在縣北六十里路通靜樂

綠水河在東門外一里發源雙松嶺東偏范家口受雨涯



之滙流四十里入綠水河遶縣東北折而東南流注靜樂縣靜遊村七十里折入汾河

青水河與綠水爲一綠水上流河胥石東流十五里水沙清而渺無石經樓煩鎮界八十里入汾

望女壑在城南

大賢河源出縣南四十里柳峪村至劉莊合昭濟祠泉經樓煩入汾

嵐水發源南八十里赤堅嶺下東流入靜樂縣界靜遊村七十里距縣界曲立村十里西流入興縣西界黑油溝折入黃河距縣界河口一百十里北逆流入岢嵐州界雞兒塢距縣界乏馬嶺十五里 縣志作新村河

蔚汾水源出尖山自桃岑山流經興縣西南六十里入黃

太原府志

卷九

山川

四

河

聖水井在白龍山

馬蹄泉在縣西南七十里

葫蘆泉在縣北十里

大水灘在縣北二十里古王虎牧馬之地土人名馬澗灘小水灘連大水灘

飲馬池在縣北六十里黑嶮山中相傳唐尉遲敬德嘗得良馬於渥洼池騎而去

興縣

桃花山在縣東二十五里高二里盤踞三里東連大寨山危峰獨秀上有桃花寨南有仙洞旁有卦石泉

仙洞在縣東二十五里桃花山南山半石穴可通入其中



時寬時隘似明戶者三內平地二畝許四望胥石穴東南穴清淵湛深水中三白石柱上樁洞頂柱左右又有窮穴一云桃花寨下石穴曰仙人洞有三口劣容側身入數百武倏開敞怪石峭立石隙小穴如峰房入者必以草節識路東南入倏有灘曰菝麥灘地殊寬洞頂高十數丈四壁胥鍾乳滴綴似積菝麥然又東南入曰仙人澗水廣可二丈色黑有獨木橋無敢渡者水有三石柱晶瑩似玉其旁洞不可勝計人莫能窮洞外峰突起羽士構閣其上

大寨山在縣東三十里高五里盤踞八里東北連石猴山石脉卧而疊起其高極目上有高王寨相傳高歡所築下有石乳洞

太原府志

卷九

山川

五

石乳洞在縣東三十里大寨山下口徑尺餘人蛇行而入中似屋屋壁小口人側身入又似屋屋頂鍾乳涓滴下成白石

十八盤山在縣東七十里高六里盤踞十里東南連合查山茂林邃壑十八曲而後躋巔  
樺林洞在縣東南六十里山多樺木巖內洞穴相通如陶復陶穴然

合查山在縣東南八十里高七里盤踞十三里東南連陽山高可二十里爲諸山冠數百里外望之蒼翠插天北峰頂有北石洞逕透山背望之通明洞南有南石洞兩峰對峙形埒山頂有飲馬泉山下有龍池禱雨輒應

陽山在縣東南九十里卽合查山之陽高五里盤踞八里



危峰刻削怪石羅峙中峰下有伽佉嶺松檜數萬株上有廣應侯祠東峰有迴光巖林巒競秀

南山在城南蔚汾水南石壁有萬佛洞

採林山在縣西南四十里高二里盤踞五里林巒高峻下有採林渡

紫荆山在縣西南九十里高十里盤踞十五里界臨縣一名紫金山 坡陀綿亘叢薄日晡輒湧雲南麓有聖母泉流爲紫荆泉河北麓石壁有穴出風能偃苗恒封不啟禱雨多應

浩旻山在縣西南百二十里黃河岸高八里盤踞十五里三面懸崖陡絕數百丈南繇石磴緣鐵絙而升爲南天門門東有泉

太原府志

卷九 山川

五

卧龍岡在西北七十里高一里盤踞二里岡南兩峰對峙一名雙侯山中有大壑河水自南北注當壑有石壁數百丈橫亘連合兩峰曰卧龍岡水繇岡下洞穴流出合嵐漪水洞石衝出者矗立水中其北峰曰天磴山峭壁千尋徹下中裂外望之石紋如磴齒兩兩相錯亦一奇也

峩嶸山在縣署北有三峰中峰殊高旁峰對峙如眉

太平山在縣北四十里高四里盤踞七里前有太平溝迤邐盤曲上有雙峰對峙爲雙山峪

小塞山在縣北五十里高六里盤踞九里一峰獨立上有寺廟

石堠山在縣東北四十里高三里盤踞七里東北連石樓



山山巔怪石攢簇曰蓮花峰峰西石崖高數十丈形似  
斤墩曰石墩峰峰北一峰別起石脉中斷架木梁而度  
嶺有墩山寺峰南有黑龍池池有黑龍祠祠後啟二小  
門深巖黝墨內有池水色蒼黑水旱不涸挹水禱雨輒  
應東有白虎巖僧與虎胥化於巖蹟存

石樓山在縣東北五十里高三里盤踞七里東北界岢嵐  
州萬山中一峰突起石壁層拔狀類樓閣高踰百丈四  
周不可攀援惟北面微徑盤迴可徐達峰頂俯視羣山  
若邱垤然

黃河水在縣西五十里自保德州入縣南達臨縣河西岸  
爲陝西界

通惠泉在縣東三百四十九步南岸高阜沸出三穴味甚

太原府志

卷九 山川

五

甘繇城北引入城半出西門半出南門西流合蔚汾水  
一作通會泉

五龍泉在城東上下五泉皆清而甘

介泉在縣東界河口清暉亭下

新泉在清暉亭東

卦石泉在桃花山側泉中小石似卦爻六觚兩角

紫荆泉在紫荆山南巨泉也流出成河沍寒不凍鴛鴦翠  
鳥時翔遊焉

浩旻泉在浩旻山南天門東山巔巖罅倒瀉如注

嵐漪水發源岢嵐州西流至溫泉入縣界又西至裴家川  
口入黃河

蔚汾水發源嵐縣王圍山西流至界河口入縣界經縣治



南又西至黑峪口入黃河水西與黃河合因以爲名

通考合河唐縣以蔚汾二

南川水發源合查山西北流至趙家川口合蔚汾水入黃河

交樓水發源十八盤山西流至交口合蔚汾水

南泉在縣北葑園坪南泉上有石方數丈

黑龍泉在石堠山石巖下雨泉盈而不溢左爲人泉可飲右爲神泉飲之多腹痛挹水禱雨輒應

飲馬泉在合查山上峰頂一泓取之不竭不取不流俗名山神飲馬池

湫水源出興縣東南八十里合查山流經臨縣東半里又名臨川河至大通入黃河

太原府志

卷九 山川

三